



ELKARrEKIN BILA, Otoizleku...

Aspalditik aitortua daukagu, eta berriro azpimarratuko dugu, Arantzazuk gizartearentzat erreferente izan nahi duela edo izaten jarraitu nahi duela. Bistakoa da erreferentzia hori ezin daitekeela inola ere izan orain berrogeita hamar urtekoa bezalakoa. Orduan agintzen zuten koordenadak asko eta sakonki aldatu dira. Hori bere horretan onartu beharra daukagu, errealtateak hala erakusten duelako.

Gizartean gertatu diren aldaketek, hala ere, ez dute esan nahi gaur egun Arantzazuk ezin dezakeela ezer eskaini. Elizarako joera jende askok utzi du eta, ondorioz, eliz barruko eragina murriztu egin zaigu. Beraz, Frantzisko Aita Santuak esaten duena kontuan izanik, Arantzazuk gizartera irten beharko du, «giza periferietara». Horrek, noski, aldaketa handia dakarkio gure ebanjelizazioari eta gure jarduera osoari.

Asmo horren eskutik ari gara ELKARrEKIN BILA proiektua bideratzen, laiko boluntarioen eskutik. «Giza periferiarik» baldin bada, gaurko baztertuenen eta hauskorrenen mundu hori da. Eta urtero-urtero hamar talderi aisialdi eskaintza egitea, gure gaurko ebanjelizazio-eskaintza dela esango genuke.

Horren ondoan, gaur egun jende asko bidea galduta ikusten dugu, isiltasunaren eta barne-lanaren bila. OTOIZLEKU proiektuak horientzako eskaintza izan nahi du. Hainbeste zarata eta bizi-ezinen tartean, barealdi eta pausaleku bat eskaintzea da.

Ikus daitekeenez, ebanjelizazio-bide berriak dira, ezohikoak beharbada. Pobreak direla? Seguru asko. Izan ere, onartua daukagu gaur egun erreferente izateak ez duela esan nahi buila handia ateratzea, benetako giza eskaintza egitea baizik.

Arantzazuko berriak

Kide gehiago gara *Arantzazuko Adiskideak* elkartean

Pozez adierazi nahi dizuegu Zuzendaritza Bartzordeko kide Iñaki Almandozen lanari esker, 800 bazkide baino gehiago garela elkartean. Izan ere, azken hilotan, Arantzazuko Seminarioan ikasle izandako berrogeita hamar inguru lagun gehitu zaizkigu, Arantzazuren etorkizuna definitzeko eta gauzatzeko helburua modu ekintzailean betetzeko asmotan. Ongi etorriak. Bide batez bazkide guztioi adierazi nahi dizuegu gure esker ona zuen kemenaz eta babes ekonomikoaz Santutegiak bizi-bizirik iraun dezan egiten duzelako.

Álvarez de Eulateren *Agerkunderako espazioak* erakusketa

2014ko garizuma-garaian, Xavier Álvarez de Eulate margolariaren eta frantziskotarraren *Aurpegi santuak* seriea ezagutzeko aukera eman nahi izan genion publikoari Donostiako Santa Mariako Basilikan antolatu genuen erakusketa txikiarekin. Bisitariak harrera ona egin zioten, baita komunikabideek ere, eta horregatik errepikatu genuen iaz ekimena, baina *Sasia sutan* bildumako zenbait lan ikusgai jarrita. Eta orain-

goan, zorionez jakinarazi nahi dizuegu egun gutxiren buruan, eta Arantzazuko beirateen egile Álvarez de Eulateren artea publikoari gerturatzeko asmoz berriz ere, inauguratuko dugula *Agerkunderako espazioak* izeneko serieko koardroekin osatutako erakusketa. Gogoetarako eta kontenplaziorako espazioak irudikatu zituen autoreak bilduma horretan.

Arantzazuko Adiskideak elkarteak eta Arantzazu Gaur Fundazioak antolatutako erakusketak, Edorta Kortadi arte-kritikoa komisario gisa duenak, otsailaren 11tik apirilaren 3ra, Donostiako Santa Mariako Basilikan, formatu ertaineko zein handiko hogeiren bat artelan bilduko ditu. Serie hori bereziki azpimarragarria da erakusten duelako jainkozaletasuna eta espiritualtasuna irudikatzen, ezin ikusezina dena, abstrakzioa baliatzen aitzindaria izan zela gure inguruan. Kortadik horri gehitzen dio bereziki deigarria dela, eta ausartarena gainera, horrelako apustua "Eliza Katolikoaren barrutik egitea, autoritate erlijiosoak abstrakzioak osagai erlijiosorik ez zuelako ustea zuen garaian. Abstrakzioa agnostikotzat edo ateotzat zuten orduan". Erakusketako bisita-ordutegia honakoa da: astelehenetik larunbatera 11.00etatik 13.00etara eta 16.00etatik 19.00etara.

Arantzazuko berriak

Otoizleku proiektuaren otoitzaldia

Otoizleku Arantzazuko fraideek, laiko talde batekin elkarlanean, sustatzen duten proiektua da. Bila dabiltzan pertsonak elkarrekin topo egiteko aukera eskaini nahi du, isiltasuna eta aditzea elkarbanatzeko. Buruz ikasi eta errepikatzen ditugun erritoei eta otoitzek markatzen duten heziera erlijiosoaz haratago, giza bihotzak, bere kontzientziaren argi-ilunean, betetasun-egarri oro asetzen duen iturriarekin topo egin nahi du. Harako bidea egin nahi du proiektuak, parte-hartzaileek elkarri lagunduz. Lehenengo otoitzaldia 2015eko abenduaren 19an izan zen, eta hurrengoa **martxoaren 12an** arratsaldeko 5etan izango da. Bertaratuak isiltasunaz baliatu ziren bereziki; baita hitzaz, musikaz eta kantuz ere. Otoitzaldia edonorentzat irekia dago: fededun, fedegabe, mugan aurkitzen direnak, bila dabiltzanak, zerbait gehiagoren egarri direnak...

Mikopoteo-jardunaldiaren bosgarren ekitaldia

Arantzazuk, udazken-garaian, mikologiaren zaleek nahiz gastronomia maite duten lagunek biziki estimatzen duten jardunaldia antolatu zuen. Izan ere, azaroaren 7an hartu zuen Arantzazuk Mikopoteoari eskainitako ekintza bereziaren bosgarren ekitaldia. Jardunaldia, urteen joan-etorrian ezagun egin dena eta publiko zabala festa-giroan elkartzen duena, Arantzazuko Adiskideak elkarrekin, Arantzazu Gaur Fundazioak eta Arantzazuko Parketxeak antolatu zuten, eta laguntzaile izan zituen Arantzazuko paraje ederreko Zelai-

Zabal, Goiko-Benta, Sindika, Milikua eta Arantzazuko Santutegia Hotela jatetxeak.

Javier Gómez Urrutia biologo eta mikologo profesionalak eta Ultzamako Mikologia-Parkeko arduradunak eskainitako hitzaldi/mahai-inguruarekin eman zitzaion hasiera jardunaldiari. Haren parte-hartzea amaitzean, dastaketari ekin zitzaien Zelai-Zabal jatetxeak prestatu zuen mokadurekin. Horren ondoren, bertaratuak Arantzazuko gastronomia-zirkuitutik barrena eraman zituen ibilbidea hasi zen, Goiko-Bentatik Arantzazuko Santutegia Hotela arte, Sindika eta Milikua tartean zirela.

Misterioari dario kultur diziplina anitzeko emanaldia

Arantzazu beti izan da kulturaren gordailu, kulturazaleen atsedentoki eta kabi. Eta bada gaur egun ere. Horren beste erakusgarrietako bat dugu pasa zen azaroaren 14an Arantzazuko Gandiaga Topagunea kultur zentroan izan zen *Misterioari dario* emanaldia. Kultura-modu anitzeko emanaldia, Arantzazu Gaur Fundazioa antolatzailerik izan zuena, Zumarragako Antiguako base-lizan ere gauzatu zen aurretik arrakasta handiz, eta Arantzazun 90 lagun inguru bildu zituen.

Misterioari dario ekitaldi berezia eta hunkigarria izan zen, zeinetan hiru diziplina artistiko –marrazkia, musika eta hitza– bakarrean uztartu ziren. Lau sortzaile jardun ziren ikuskizun bitxiaren hariak ehotzen: Josu Maroto marrazki-lanetan, Pello Ramirez biolontxelistan, Jon Goenaga piano-jotzailean eta Andoni Salamero poesia erreztatzen.

«Koadernoak» sail berria

Arantzazu aldizkarian azaldu diren artikuluak interesgarriak direla pentsatuz, eta idazle bakoitzarenak era bateratuan jasotzea interesgarria izan zitekeela uste izanez, ideia berri bati gorputza eman diogu. Argitaratutako artikuluak osaturiko saila argitara ematea, «Koadernoak» deitu dugun sail berri batean.

Oraingoz bi liburuxka atera ditugu:

– Javier Garridoren «*Arantzazu y su espiritualidad*» interesgarria. 33 artikuluz osatutako liburuxka dotorea. Liburuxka hau Arantzazuri dagokiona izanik eta hartarako baliabideak bagenituenez, argazki eta guzti doa.

– Bigarren alea, berriz, Xabier Etxeberriaren «*Pequeña ética de convivencia*». Beste 33 artikuluz osatua

ale hau ere, Xabierrek hiru urtean idatzitako lanen bilduma interesgarria.

Argitalpen-sail honi ale berriak erantzen joango gara, hori da behintzat daukagun asmoa. Gauza jakina da aldizkarian frantziskotar alorrean idatzitako artikuluak «Hermano Francisco» (Joxe Mari Arregi) eta «Minor» (Aguraingo Klaratarrak) sailetan argitaratu izan direla. Uste dugu autore bakoitzaren lanak bilduta edukitzeak estimazioa izango duela. Nahi duenak EFArantzazu argitaletxean edo maila honetako dendetan aurki ditzake liburuxka hauek.

Hurrena arte, besarkada.